

Johor tidak lagi bergantung kepada air dirawat di Singapura
Malaysiakini.com
March 27, 2007

Johor tidak lagi bergantung kepada air yang dirawat dari Singapura manakala republik itu pula telah mempunyai sumber air Newater sendiri, kata Setiausaha Parlimen Kementerian Luar Ahmad Shabery Cheek.

Katanya, buat masa ini, kerajaan belum memutuskan untuk memulakan semula rundingan dengan Singapura berhubung isu air.

Menurut laporan Bernama, Ahmad Shabery berkata, perjanjian bekalan air antara Johor dan Singapura yang ditandatangani pada tahun 1961 dan 1962 akan tamat pada 2011 dan 2061.

Beliau menegaskan demikian ketika menjawab soalan Datuk Md Alwi Che Ahmad (BN-Ketereh) di Dewan Rakyat hari ini, sama ada kerajaan bercadang mengkaji semula perjanjian bekalan air ke republik itu.

Ahmad Shabery berkata, kerajaan telah mengambil tindakan mengkaji semula perjanjian tersebut melalui rundingan dengan Singapura.

Belum capai persetujuan

Namun, katanya, semua rundingan yang diadakan sejak tahun 90-an itu tidak mencapai sebarang persetujuan.

"Kerajaan sedang mengkaji langkah seterusnya yang terbaik untuk mencari jalan penyelesaian, sama ada membawa perkara ini ke timbangtara atau memulakan semula rundingan dua hala, walaupun Johor tidak lagi bergantung kepada air yang dirawat dari Singapura dan pihak Singapura pula telah mempunyai sumber air Newater sendiri," katanya.

Mengenai rundingan isu tertunggak dengan Singapura seperti pembinaan Kompleks Kastam, Imigresen dan Kuarantin serta tuntutan bertindih Pulau Batu Putih, Ahmad Shabery berkata, buat masa ini kerajaan memutuskan untuk tidak berbincang mengenainya.

"Perkara itu dipendamkan buat seketika waktu setelah kita berhadapan dengan isu pembinaan jambatan yang dikaitkan dengan ruang udara dan bekalan pasir yang telah menimbulkan satu keadaan yang begitu menekan dari segi emosi rakyat Malaysia.

"Sebab itu kita pendamkan dulu dan tidak membincangkannya lagi sehingga kita rasakan masa dapat mengubat hati rakyat Malaysia sehingga kita dapat buat rundingan baru," katanya.